

摘藻堂四庫全書薈要

集部

欽定四庫全書薈要卷一萬六千三百六十七

集部

道園學古錄卷四十

歸田藁十四

元 虞集 撰

題跋

跋劉資深墨庄後

清江劉氏墨庄之說具在方策著乎當時傳之後世學士大夫喜稱道之及新安朱子為靜春氏作墨庄記始有以啓學問之大原以達其期望之先志臨川吳子為

公非氏之八世孫自得兄弟作墨庄後記以農喻士因田之有上中下以喻學之品級以終朱子之言焉其所以為墨庄者富矣而自得又欲集識其後集復何所言哉然得王良為之御而車弗駕也終不能以適遠扁鵲為之醫而藥弗飲焉終不足以已疾先世之言二公之記紬繹而服力焉可也請因田而申言之墨庄之興至于今三百年不待代易而耕矣高曾至于雲初世守之知夫地利之宜熟矣浚之以忠厚之源潤之以詩書之

澤其歲有所獲者匪今斯今矣二公猶田官然示之以
耒耜之利者朱子之言也別之以嘉穀稊稗之分者吳
子之言也善為田者將為嘉穀乎將為稊稗乎勉於耒
耜之利乎將不勉乎吾知其子孫之從事於斯莊也菑
焉播焉其有獲也必矣必也如二公之說得嘉穀而種
之則其為實可以衣被生民非止一身一家之利而已
題吳先生真樂堂記後

樂發於情者也有中節不中節之分而無真偽之辨蓋

雖不中節之樂亦由其情之所感自以為樂而不待於
偽為也惟君子以理命氣則其樂也無妄乃可謂之真
矣讀吳先生為劉天爵作真樂堂記慨先生之不見感
其言之如新故書其後而歸諸天爵云

跋艾聖傳三絕碑後

集歸耕臨川山中道至城府問故家舊族於郡人聞艾
氏最久遠願見其子孫而徵世德旦日道孫來謁見故
宋郡守徐公霖所題如松甫墓銘後已著其五世矣天

歷已已故翰林學士吳公所題則八世九世矣何其盛哉明日往謝之道孫以集升其所謂中和之堂見其五子十孫二曾孫皆循循有禮度其居中郡前覽夷遠後據崇固在昔季宋顯官貴人邸第相望今無存者而艾氏之居則曾子宣故宅也郡人推以為最勝處以時考之紹興艾氏以舉鄉貢在此則去子宣蓋無幾時也道孫又言昔東偏樓藏書萬卷內附後多遺失而子孫不敢忘學也嗚呼此又善保其世德者乎鄙薄之夫驟起

倏仆者觀乎此亦有所感發已夫

跋程文憲公遺墨詩集

楚國文憲公早年以功臣子入見即受世祖皇帝知遇
歷踐文字風憲清要之任時游廟堂裨贊國論起家東
南者未能或之先也故宋之將亡士習卑陋以時文相
尚病其陳腐則以奇險相高江西尤甚識者病之初內
附時公之在朝以平易正大振文風作士氣變險恠為
青天白日之舒徐易腐爛為名山大川之浩蕩今代古

文之盛實自公倡之公既去世而使吾黨小子得以淺
學末技濫奏於空乏之餘殆不勝其媿也歸來山中猶
未得盡見其家集公孫之來尉崇仁也乃得公持節武
昌時行部近縣親書五十日所為詩八十九首伏而讀
之至于再三不忍去手見其冲澹悠遠平易近民古人
作者之風其可及哉而公之為政不大聲色以為厲而
嚴重崇高隱然泰山巖巖之勢又豈硜硜悻悻者之所
為哉相望纔三四十年而風聲氣習邈乎遼絕敦厚之

風猶可繼耶敬書其後而歸之

書范左司事後

按胡公之貶在紹興十八年范公之請祠相去時不遠其父猶在至二十二年則范公丁父憂蓋不獨為其母以身許人也其行述秦檜有舜文但領取侍從去何用兩言之語而行述乃書除兼給事中兼權樞密副使則是既以從官登二府矣檜何以有此言也當時文臣少除樞密副使又不知左司便可兼給事与否檢正稱三

省亦所未曉揭公史官也必有所考集未之知也

題沃呼氏世譜

集嘗待罪著廷勲臣諸侯王世家未嘗不得覽焉順德
忠獻王社稷大臣勲業尤著又嘗親見而執筆記載其
事其族系則未之知也其族孫錫哩布哈舉進士高科
有斯文之好其仕於江右始得見其世譜如此古者衆
建諸侯各有其國傳之子孫則有大小宗以聯絡其族
有采地以食之疏弱者蓋鮮矣忠獻以王爵食順德實

未始去朝廷父子相繼出鎮中外倚重未嘗就國而即安是以一從之孫已有困乏之嘆然而物不能兩大譬之木然本固而封厚者其枝之暢達或在於彼或在於此豈有常乎國家興王之初以幾畧著功及夫危難之間身任社稷之寄承平之餘天下無事則以文學政事顯著而繼之固其宜哉

跋雙井黃氏家譜後

豫章黃氏自金華來其族分居豐城之宛岡分寧之雙

井雙井之子孫衆多又分居筠之上高宜春之萬載萬載之族有太史文節公之從昆弟戶部郎中諱叔豹氏之七世孫曰德榮者持其譜相示集受而觀之見其終宋之世登進士第者相望殆數十人衣冠文獻歷歷可數求諸郡乘莫或過之集嘗見太史公家書言馬鞍山事曰冲和偶在此一支蓋古之君子槩觀其本初則一人之身所分也是以宗族之間有盛大者不啻已有之忠厚之至也而豫章集中諸父昆弟子孫名字行業多

可考見而太史公之孝友清節百世之士也其能保族
於久遠也宜哉德榮思先世之盛而不敢輕其身惟其
所在以奉承其詩書之澤江海之流始於涓涓松柏千
仞起於毫末德榮其母自卑而慎之哉

跋曹氏通濟倉記後

前代士大夫忠信而篤實於已之所當為分之所得為
力之所可為知之所及無不盡其心焉非必有所為而
為之者也仕有世祿民有積業以其有餘分諸親戚隣

里之不及亦天理人心之常而仁人君子之事也蓋自
分田制祿之法久不如古大夫士之家農工商隸兼并
無藝而私財不均始相懸絕於是君子又因時宜而推
其惻隱之心以行均齊之道以救一時之急如朱文公
社倉之類是已臨川之宜黃曹工部家簪纓華遠鄉里
稱之縉紳道之二百年來門戶弗墜故翰林學士吳公
序其家世甚詳益可以傳信矣又從其家外孫李本得
見其出粟米濟鄉里之實事舉族同心慮事周悉蓋有

前所謂無所為而為之者不見其有要譽於鄉黨隣里之意慨思前代之君子其不可及也如此夫或曰子孫之綿遠殆食其報理則固然而非君子之所計也已近時偶有水旱之變朝廷不愛一官之冗以勸分於富室或者又有虛濫以為欺速報以自銜吾儕小人朝不謀夕將無過於淺乎

跋曾氏世譜後

南豐曾氏之族其在金溪者以故宋南安守仕于國朝

僉福建閩海提刑按察司事以奉議大夫致仕諱冲子
之孫元默命其子衍以南豐金谿曾氏世譜示集受而
讀之作而歎曰善夫文昭公元豐七年所為族譜敘也
文昭之言曰家傳舊世系以為溫彥博高士廉所撰而
有不敢信者經唐末五代之亂又有不可考者自其身
追尋先集之遺至其鄉石記鐘銘之屬得其六世之名
諱猶有不能盡知者蓋慎之至也曾氏一門若文定文
肅文昭一時文獻之懿度越今古文肅貴為丞相自可

以見其源本之深固而足以知其流裔長久盛大矣世之人曾不知古人之意妄引名族賢者而自附焉覲以自表而不知誣祖之罪其為不孝甚大而其官爵年代叅錯舛誤徒貽識者之笑歎是故若文昭之志其族譜所以為君子之道而後世之所當師法者也且夫子孫既多支分派別而服盡而親盡而譜有不能及者遂至如塗之人士大夫家著譜者嘗病之而文肅公之言又曰後之續此書者世緒既遠並載則不勝書彼此各書

則可以互見此良法也此小宗附於大宗之微意也士大夫家作譜者之所當知者也曾氏自南豐而金谿三百年間人門並著譜無遺闕而按察公兄弟三人在故宋時並踐華要推恩先世至於師保南豐三君子以來金谿又其一興也集嘗觀於臨川之乘自宋初有黃門樂侍郎晏元獻公王荊公之家樂之子孫尚多晏亦有之而王氏之後分居金陵其後人特少南城既自為郡南豐又別為州其居金谿者復為臨川之大族何其盛

哉集嘗得罪國史歷觀國家貴戚勲臣世系承詔撰經
世大典必移文其家按其文字石刻與簡冊不謬又詢
其子孫至於故老而後謹書之正恐他日有溫高之致
疑於後世乃若前朝之故家遺族僅存於今時者集亦
嘗得見其人見其譜而讀之其不勝感慨者多矣若曾
氏者其可感也夫其可敬也夫

跋劉墨庄世譜後

故宋臨川世家莫如樂侍郎晏王二丞相家最貴重南

渡後如橘園李侍郎青田陸先生及崇仁羅春伯樞密
月湖何同叔尚書梅亭李公父中書皆著姓而有道德
行藝文學政事卓卓有述者及他郎官卿監以下尚多
有之內附國朝將七十年喬木故家或著或微其譜或
存或否要必有賢者出而後有以亢其宗而興之也其
自外來寓者則有桐木韓氏子孫近得見譜於郡城俯
仰今昔伊可懷也墨庄劉氏自清江來金溪遂為其邑
之望諸孫叔熙能以垂三百年之家世及其文學交游

之懿輯為三臣編何其備哉噫詩書清門有能世其學者則可以有譽於天下而貽永於後來矣

題先丞相寨屋親帖

右先丞相雍國忠肅公五月十日寨屋劄子真蹟當是故宋乾道七年在相位時與洪公遵之書也按家傳是年五月丁亥後殿進呈文字次上曰洪遵近日職事甚留意公奏云遵言建康寨屋間有木植小者若欲覆瓦須當抽換臣昨因問李澤乃知蕪湖當塗兩寨木植甚

小不能勝瓦此皆太平管下縣也故遵以為言上曰遵
朴實不欺如此適有中使自海上還言馬司人至新寨
無不歡喜皆云官家愛惜士卒它日調發止過一水便
可接戰免得臨時道途之勞公奏士卒却知陛下聖意
朝臣喜為紛紛之論者聞此能無愧乎上曰然劄子中
有紛紛之說正與此同故知此帖與洪公無疑丁亥正
其時也阜陵無一念不在復其先業丞相左右之雖微
細經畫內外之志相通如此尺素流傳人間而家乘所



載昭合誠之不可揜如此夫後百六十九年豫章甘璋
伯昂以其家藏此帖示集集謹考其事而書之曾孫集
謹書

跋朱文公先生與黃商伯書後

按此書當是先生守漳州時與南康黃君灝之書也淳
熙十七年庚戌四月先生至漳州所謂至前申省自劾
未回者當是去年十一月改知漳州之初文字也十月
地震并以足疾不能赴錫宴自劾求去又明年始去州

商伯與先生論學如陰陽五行仁義禮智物格知至心
喪等書具見先生所畱書先生嘗有書與商伯云所論
讀易之說真無欲之說皆平正精切非一槩悠悠之論
且年亦過中而更閱世故又已多矣乃能切切用力於
此愈於年少新學之為者是可尚已學者凋喪古道濶
希所謂平正精切之學歷練世變而用力尤切者讀之
竦然至元五年三月某日後學虞集題于臨川城中僧
舍

跋吳先生新登譙樓詩後

至順壬申十有一月郡新作譙樓部使者郡監若守請
先生觀焉先是先生以第三子京教授郡學來就養焉
登樓後賦此遂出城竟歸其鄉焉嗚呼先生此詩之作
至於此有不得而自已者矣昔者曾子著大學之書言
修己治人之道而中庸之書則子思子憂道學之失其
傳而作者也後千有餘年程子曰周公歿聖人之道不
行孟子死聖人之學不傳道不行百世無善治學不傳

千載無真儒嗚呼此豈有幾微倍謬疑惑於其間者乎
陸先生王丞相寥乎天地之間氣卓乎千載之豪傑殆
非臨川山水所得而私者也然而臨川有如是之父兄
君子也豈他郡之所可望哉吳先生微疚之言蓋有慨
於先哲之所深憂者矣明年六月先生卒嗚呼此集之
所謂至於此而不得自己於言者乎先生之門人袁明
善求集書此因識其後云至元己卯七月既望虞集書

重書黃子中澄陂堂記後

君子之所以大過於常人者以其有量也所謂量者容納萬事而不以為襍酬酢萬變而不以為勞世不見知而不為之愠時見用而不為之厭富貴利達貧賤憂戚無一足以動其心而區區簞食豆羹蜂蠆之螫破釜之失而愀焉以動執焉而不化者又豈足以語此哉是故斗升釜鐘之分瓶甔甕盎之盛一受形而不可易器之物也而人也稟天地之粹精而最靈豈無擴充之道哉是以昔之言量者喻之以江海而不足必準之以天地

焉嗟夫常人而望賢人賢人而望聖人豈易至哉然而
其得於天者無不同也而心之限量虛明廣大亦無不
同也則君子之所自進也蓋必有其道矣故又有言曰
識進則量進量之狹劣由識之不明也識不明而謂之
量者漠然於事物之應無町畦無畔岸而已矣是故又
有言曰考索而得之者多窒明睿所照則廓然而大公
明睿所照識之至也是以求諸聖賢之遺言涵養省察
而自靖焉有以擴其心之所之則庶幾矣宜春黃氏之

先以澄陂名其堂余嘗為記之其子盅子中自其少時受學於臨川先生之門蓋有聞焉於是又欲余廣澄陂之義故為之言如此乃作而歎曰昔漢東都世運否塞大往小來陽微陰盛大夫君子不勝其忿起而救之名節相先九死而不悔介特而嚴固猶懼小人之不勝也而叔度獨有汪汪之量為世所咨嘆至以顏子目之當時諸賢信之不以為過後之論者傳之不以為非而畧無一事之迹可以推見於史冊其為人也何其高遠深

微也哉昔者顏子簞食豆羹不給於陋巷而夫子語以
四代禮樂孟子曰禹稷顏回同道此豈以其迹而論者
乎惜夫叔度之生也後不得見夫子而親炙之以就其
所至而論定於孔門焉嗟夫子謂回也終日不違如愚
退而省其私亦足以發回也不愚觀乎叔度澄不清而
撓不濁也誠有如愚之意焉然而顏子之所發當時同
門之士固有未盡知之者況於千載之下吾黨小子乎
由此觀之叔度之所以為量其有所不可知也夫其有

所不可及也夫而其可知者孔子之於顏子始終以好學歸之學者學為聖人者也周子曰學顏子之學過則聖及則賢不及亦不失於令名子中以所聞於臨川者而盡心焉澄陂在其中矣

書先世手澤後

崇仁陳氏所藏我先大父知郡開國尚書郡侯手書九幅其一與主簿公其八與主簿之子校勘公先君國史參政郡公手書三幅皆與校勘公者也校勘公之子得

仁命其子宗蕃裝為一卷而命集識之集謹考家乘故
宋嘉熙己亥之歲我王姑歸于陳氏為安撫公之夫人
有二子湖南節推同祖江西運屬懷祖也而主簿公則
安撫公之親弟也夫人以歸陳之明年以郊恩封安人
淳祐二年壬寅以漁墅陞正郎封宜人九年己酉安撫
公沒寶祐四年丙辰尚書公解永州郡組將適臨安道
過臨川宜人率其二子迎伯舅至崇仁因得項氏故居
于邑南門之外留居焉而吾家之居崇仁自此始尚書

公居此二年有沿海制叅之命適行都景定元年庚申
國朝大兵臨鄂渚江南震懼世祖皇帝入登大位兵還
江上稍安是歲尚書公去官來崇仁十月宜人以疾終
而運屬先一年歿矣明年尚書適行都又明年癸亥有
連州之命歲甲子咸淳改元之連山道過崇仁小留於
寓宅秋暑之書是其時也其八書則連州所遺書中云
請校勘公之女暫奉運屬香火權宜以慰存歿之情云
耳校勘公女後歸中書李公諸孫而宗蕃之仲弟宗紀

為運屬之孫矣其欲為校勘致一官者深知校勘公之
材器可用於世也其曰思梅先生則得仁之本生父也
當是時思梅猶未登乙丑進士第而名譽已著於時矣
其曰蓮塘之居即所得項氏宅也其相託以俸餘經營
者亦可以見財用之入無不可對人言而親戚之忠厚
相信也二年乙丑尚書公薨于連先參政護喪還葬吳
郡其三書皆自吳中作也先宋既亡先參政歸自海上
力不足以適吳以至元甲申之歲復至宗仁猶與節推

校勘居今五十三年矣二公與先公先後去世已久虞氏今五世陳氏有六世孫矣集雖無所肖似徒保遺書以與得仁相從於澹泊之鄉百年之好庶幾無斁後之子孫尚有攷於斯文哉

跋柳誠懸墨蹟

余幼年來崇仁得柳誠懸所書嵇叔夜絕交書石本云是中書梅亭李公携歸蜀物是時余未識柳公筆法亦不知此石鐫勒之精否摹搨之工拙也後官成均與鄆

人曹彥禮先生同館見其所藏柳公易賦靈寶經真蹟
非惟筆精墨妙嚴勁縝密神采飛動至于界畫粘綴硬
黃搗練各極其工之精者矣留几格臨玩僅半歲博古
好雅者以重金購諸曹氏後雖數見不能久矣歸田以
來百慮消盡時憶故物了然心目之間則亦不可謂全
無累於塵影者矣而謔致榮乃得絕交書墨跡與石本
並卷亦云是李公蜀物也而余目障成痼略不能辨波
磔點畫於茫渺之際傳曰盲者無以與乎五色之觀雖

有至寶邈然不知深為悵惘書其後而歸之

跋山谷書蕭濟夫墓志後

古之君子其擇交也尚德生而與之游也無愧色歿而為之言也無愧辭其山谷先生與蕭君濟父之謂歟故其所為文章翰墨若有鬼神陰相之是以好事者雖復巧取旋亦流轉垂三十年終為其諸孫昶所得和氏之璧不毀於秦庭鏐鄒之劍終歸於延津物理固宜然也噫蕭君之德黃公之文學士大夫傳而誦之久矣故不

待於盡見其真蹟而一筆一墨出於先賢之手先世之遺在子孫當藏之在他人不必固獲也然能善摹而廣之亦足以少厭好事者之心乎

跋吳廉使可堂說後

路提學著廉使吳公可堂之說凡經傳論可不可者据拾幾無餘焉客有持以示僕者昔在延祐中集竊學者之祿於成均僦居京城與公同巷其舍相去甚邇親見公之事其太夫人也是時公尚貧甘旨新異之味無日

不具其夫人親餽以饋太夫人未食公不敢出也諸孫
幼太夫人甚愛之每輟食以飼每食率先具豐膳使足
徧賜而有餘隨以精饌進太夫人必悅而飽焉退而食
於私室太夫人使察之見其甘食謂若與已饌無二者
甚安以喜不知其實疏糲也舉家長幼安行以為常是
時集先妣已去世先公在江南旦暮適公館見其為養
如此未嘗不刻心感嘆也夫事親之道安有過哉孝如
曾子孟子猶曰可而已吾見公之為養者如此而歎然

猶若自以為有未能盡者也此吾知可堂之可之實之一也公後連典東南數大郡兩拜行省叅政以廉明數持憲節福祿未艾而其子方以時材為顯官于朝公之數歷中外能左右之使無顧慮云噫天之報孝子也若是乎

題李肩吾字通序

李君肩吾在魏文靖公之門有師友之道焉是以公序其字通取其自隸楷而是正於六書又進之以學使極

變化而通神明者魏公書後題字則集之從祖父戶部
府君而魏公之壻也魏公歷靖州七年先戶部從之學
故亦與肩吾友善多所講明也今隸楷之法亦且寂寥
又能錄其文與六書合誠切用矣自叔重所錄以來二
徐之言詳矣至戴侗氏六書故盛行于世凡為六書之
說頗為要論惜乎魏公及先戶部與肩吾皆不及見之
也豫章龔觀學篆字得李氏字通而善之將刻梓以貽
諸好事集以為必盡載魏公虞公之言而後可以成李

氏之美蓋前輩序言皆有關係非若近世妄求妄與以徇人情而已者也

跋宋高宗親札賜岳飛

大元故翰林承旨魏國公謚文敏趙公孟頫懷古之詩曰南渡君臣輕社稷中原父老望旌旗集承乏國史嘗讀其詩而悲之以為當時遺臣志士區區海隅猶不忘其君父何敢有輕之之心也哉今見思陵賜岳飛親札則其奏功鄜城時所被受者觀親札所謂楊沂中劉錡

立功之事則紹興十年七月也是時秦檜方定和議而飛銳然以恢復自任所向有功飛之裨將楊再興則邦乂之子也單騎入陣幾殪烏珠身被數十創猶殺數十人而還一時聲勢可知矣是以郾城之役恢復之業繫焉飛之師乘勢薄朱仙與烏珠戰破汴在頃刻而檜亟罷兵詔飛赴行在而沂中劉光世錡皆以其兵南歸自是不復出師明年十二月檜遂殺飛父子而烏珠無復憂色洪皓區區蠟書雖至而中原無復餘望矣乃知文敏之

詩其為斯時而發也歟

跋朱先生荅陸先生書

按朱子年譜載陸先生與人帖云朱元晦在浙東大節殊偉劾唐與正一事尤快台人之心雖士大夫議論不免紛紜今其是非已明白江東之命出於九重特達於羣疑之中此尤可喜即書中所謂長者亦不以其力辭為過者也又按朱子荅葉公謹書云近日亦覺向來說話有大支離處反身以求正坐自己用功亦未切爾因

此減去文字工夫覺得氣象甚適又與胡季隨書云衰病如昔但覺日前用功泛濫不甚切已方與一二學者力加鞭約為克已求仁之功亦粗有得力處此兩書皆同時所書正與書中所謂病中絕學捐書却覺得身心頗相收管似有少進步處向來泛濫真是不濟事之語合蓋其所謂泛濫正坐文字太多所以此時進學用功實至于此也然竊觀其反身以求之說克已求仁之功令學者且看孟子道性善求放心之說直截如此用功

蓋其平日問辨講明之說極詳至此而切已反求之功愈切是以於此稍却其文字之支離深憂夫詞說之泛濫一旦用力而其効之至速如此故樂為朋友言之也病中絕學捐書豈是槁木死灰心如墻壁以為功者朱子嘗歎道學問之功多尊德性之意少正謂此也噫陸先生之問傳之未久當時得力者已盡而後來失其宗而後知朱子之說先傳後倦之有次第也因見揭集賢無客氣之語有慨然於予心者故為申其說如此云

跋子昂所畫陶淵明像

陶淵明集傳于世幾千年矣臨川吳幼清先生以為其詩泊然冲澹而甘無為者安命分也慨然感發而欲有為者表志願也蓋以擬諸屈大夫之辭云然楚辭得朱子發明之而陶之志悟者蓋鮮又因二子而推言張子房諸葛孔明區區之心欲明君臣之大義於天下則同也留侯武侯事業可見而屈陶託諸空言而其心之明白天下萬世信之何其偉歟予嘗以斯言也想見四君

子於千載之上恨不得為之執御焉幼嘗游楚見屈大夫像於山澤之荒祠稱其所謂憔悴枯槁者留侯像世或傳之而畫者以太史公言其狀貌乃若婦人女子不勝其志氣乃以意而彷彿之似否未可知也歸蜀見武侯像衣冠良是而年代深遠傳倣疑未必盡然江鄉之間傳寫陶公像最多往往翰墨纖弱不足以得其高風之萬一必也誦其詩讀其書迹其遺事以求之雲漢昭回庶或在是云耳臨川郡貳幕大梁卽宏父得吳興趙

公子昂所寫淵明像蓋公之胸次知乎淵明者既深且遠而筆力又足以達其精蘊是以使人見之可敬可慕可感可嘆而不忍忘若此乃為之述贊云

田園歸來涼風吹衣窈窕崎嶇遐蹤遠徼帝鄉莫期乘化以歸哲人之思千載不違

跋張魏公與劉和州墨帖後

昔南軒先生修諸葛武侯傳以明其父之心以為無愧辭焉觀魏公與劉和州之書則亦開誠心布公道集衆

思廣忠益之事按文林郎劉子厚著和州行狀云我先
雍公以中書舍人叅贊葉公軍事立功采石時和州獻
平戎十二策及防江利害三劄極為先公所重即驟用
之遂能徙海陵公私之舟萬艘焚陰沙積糧三十萬金
人之計失而氣沮其功蓋不細矣魏公第一書蓋指此
乎前代之史大臣有勲勞于國家凡文武才畧之士出
而佐之者不能別自立傳亦牽連得書則和州之事魏
公及我先公之傳皆可附見國家列聖屢有修宋史之

詔和州子孫得上其遺事以補闕文不亦偉乎方采石之功既立國勢畧定思陵起魏公於責籍委以江淮諸軍聞之首額相慶争相効用其區區忠本朝之心青天白日精誠之素孚於天人者焉可誣也雖李宗趙曲之失不可掩而其功烈亦偉矣筆削者尚慎之和州之孫新隆州學正謙出此卷相示論先契於二百年之表故謹書以歸之

題臨川西原許氏族譜

許氏之譜因荆公之文而數百年間天下誦而知之許氏之世德固盛矣士大夫家豈無許氏若者哉郡邑之望子孫之傳無所遠聞者不皆有荆公之文故也然而四方之人因荆公之文而知許氏之先不如臨川之人見許氏之子孫而有以信乎荆公之言也士由文而顯文以人而行君子可不務乎

跋黃思順醫說後

傳言善養民者必曰如保赤子心誠求之不中不遠矣

若思順保赤子於疾疢而數中焉不以誠求之而能若是乎孫先生郡之師表既亟稱之危太樸勤敏忠厚好學之士也又往從學焉則思順世學豈他人所可及哉
跋張方先生傳後

史臣書事惟戰功文學治迹則易書隱君子之為德則難言也一世猶難言之況於累世乎太史公書伯夷傳載許由之塚東漢書黃叔度傳其文雖不及於司馬而能使後世擬叔度為顏子而人信而不疑亦文章之難

事乎張先生四世有隱德歐陽公銘其墓揭公為之傳
皆能發其幽澹以為有志於當世而安於不用使彼沾
沾自喜急於人知得微官竊寸祿久則又以為不足熱
中而求進視張氏不亦有愧乎此史官所以有關於世
教也予友人張善式先生之從子得其家所謂讓堂之
記者讀之則其退然深自抑畏通乎一族上下高曾子
孫共守之則亦信其能隱矣讓不爭也不爭故能隱有
爭心則不能隱矣然隱顯有時而讓在己君子求其在

已者而已可不務乎尚彬者吾從玄教吳大宗師識之
吳公胸量寬大而擇賢甚密彬之見知非偶然也其兄
宗明為台州儒學正予未識之因善式而知其為善士
矣前史官雍虞某書

跋彭壽卿所藏先郡公手澤卷後

崇仁彭壽卿以童子將命故宋宗正寺簿思梅先生之
門公自擢高科從臨安平江建康臨川大幕府文武吏
士賓客無不納交於公者壽卿於此時治文史慎應對

聞見之廣非窮鄉陋巷草茅所能及者既內附推擇郡吏不為世俗刻薄佐江西提舉學校士友多稱之佐州縣廉無所取既老以歲月當赴選吏部得調官於朝極貧不能行待黃氏子孫不失門人之舊家居將十年有書數卷而已嗟夫廉吏果不可為歟其所藏書有欽宗在金人圍中奏報太后手書數幅讀者無不感泣又有呂惠卿一書與其私黨深怨司馬溫公者讀者無不憤怒大抵意在古雅不以奇玩居貨者也此卷我先叅政

雍郡公所與之書而集與亡弟嘉魚大夫之書附焉蓋其好尚猶有無所為而為之者然亦無益於壽卿之貧也感其敬愛不忘先君之意輒書其後而歸之

題盱江傳路手卷

盱江傳路以其從父淵道所得范君德機隸書瓠山王公所為手植檜刻聖像記與公子繼學叅政所為作大成詩六章王公之文雅重德機之書清勁皆足寶玩而叅政書清潤完整文又宏博東郡之士未能或之先也

王公遠矣德機又不可復作繼學自海上北還頗有末
疾書亦不能如前矣淵道早歲修整客諸公間風采蘊
藉與予游幾四十年始憲史為鹽官路為文送之情誼
甚古有君子之風焉文學之懿其有望於方來者乎

題蘇文忠公諸帖

臨川陳氏自雒州府君以來世有名族集之祖姑實歸
雒州家法尤整肅我先祖尚書公解組永州始寓茲邑
蓋繇陳氏姑為焉依也陳氏舊多藏書更代之後散軼

罕存者從表姪宗紀以此卷來示蓋其家故物而卷尾題字則雖州之子華麓先生手筆集視之為表伯父矣此卷坡書及石湖跋皆真無疑

題何氏所藏蜀郡名公書翰

故宋尚書月湖何公從子房州史君出蜀時送行詩一大軸其中有名從方從簡者崇慶太守從並從日者兵部郎官直寶文閣夔路安撫皆集從曾大父也我先郡公閒居崇仁從何氏得見此卷又按家集得曾大父滄

江提刑府君同時所賦手書以補之蓋先丞相與尚書公相及於朝而尚書公鎮夔時先從曾大父嘗受其薦其契好非至此邦而然蓋二百年于茲而先公所補一篇亦三十年矣俯仰今昔感涕泣然尚書裔孫元吉舉以相示留之十餘月慨念故鄉先賢聲采遼遠幾無知者欲自趙公彥訥以下稍為疏其行事爵里之一二而集目障為阻久未能書元吉從事南康遽有行色姑識此而歸之餘俟他日也

又題

仲安之子元吉以此篇及所謂二十二篇者示集蓋二十
二篇者皆蜀先達集欲稍疏其人爵里以遺之而此
弓則崇仁之大夫士也集先大夫尚書郡侯始來崇仁
而先叅政郡公內附後留此弗能去則亦樂其文獻之
懿云耳而人亡世遠習俗寢失其初集欲益求此邦前
人遺事輯錄以示吾黨之小子此故在所徵也

題岳飛墨蹟

武寧湯盤藏其先世文林君軍中文書岳武穆王紹興
元年所署也文林始以太學生上書論備禦之策崎嶇
兵間以功致文林之命觀此牒知文林倡忠義擊叛潰
保鄉里甚直而壯噫可以見其人心之一士氣之盛而
其將又有若武穆者宜其足立國於摧敗危亡之餘也
盤言武穆之死文林上書論列遂并受害文丞相嘗題
其家之堂曰忠節遺墨故在而張循王劉太尉所署別
為卷俯仰二百年而感慨係之矣近年集在館中將纂

修遼金宋史館中皆以遺書亡軼為說若此者可徵尚
多乎哉

題曾歐二公帖

右歐陽公曾公二帖審定真蹟無疑歐陽公著書所以
資僚友之考訂者謙至而周悉曾公家書所以事其兄
嫂者忠愛而敦篤所謂盛代之德人文學之師表也觀
者因翰墨而想像其詞氣因詞氣而涵泳其德業所得
不既多乎

跋黃勉所藏醴泉銘

唐人云書貴瘦硬方通神瘦近清寒清寒則氣易弱硬則堅苦堅苦則勢易危深山道人積精鍊神滓穢日去清虛日來雖頗清羸而冲和內融所以能肌膚若冰雪綽約若處子歐陽所以可貴也

表

謝恩表

恩頒召瑗命以使華賜浹上尊宥之筐實荷皇明之下

燭揆微賤以奚堪中謝伏念臣性本顓蒙學尤迂僻論
思獻納昔陪顧問之羣儒奔走後先願效驅馳於今日
終匪適時之器不逃過實之譏炯炯丹心每若藿葵之
向日蕭蕭白髮頓驚蒲柳之先秋福過菑生病隨年至
尚優容其出畫遂偃偻以循墻三徑就荒幾安身之無
地九門既啓惟因夢以朝天已甘終老於山林敢望復
還於臺閣當冕旒之清燕念簪履於棄遺三公明敷奏
之言一札布允俞之旨重煩駟騎遠訪羈臣此蓋伏遇

皇帝陛下學煥堯文聖躋湯敬繼志述事奉文母於萬
年論道經邦咨師臣以百揆民物咸躋於仁壽皇風大
底於清夷並育羣生不忘細物臣敢不力求藥石思致
涓埃宣室縱還何補聖聰之達康衢有頌深知帝力之
加

謝箋

大臣敷奏仍館職以賜環顙使至家錫宮壺而加錦恩
霑草芥光駭里閭中謝伏念臣昔事先朝徒因薄技學

雖固陋非堯舜之道不敢以陳代逢聖明謂帝王之制
坦然可舉載筆每親於黼座紬書已納於石渠庶幾一
代之言允作百王之法甫終青汗俄抱烏號歷嗣聖之
重明陪老成之末議深慚衰謬有負使令疾疢日加不
待嚴助之請告鬼神夜問尚思賈誼之召還沾漑醇醲
衣被文采醴酒更設遺簪載華春陽下及於苑枯勺水
實虞於盈滿茲蓋伏遇皇帝陛下德隆扶日功厚補天
憂在進賢夙贊東文之治人惟求舊思皇訪落之勤顧

通籍之腐儒眇侍輿之故物遂令屏棄亦被甄收臣質
固顓蒙心知眷遇江湖雖遠孰非日月之照臨齒髮尚
存敢昧涓埃之報稱

道園學古錄卷四十

謹案卷四十第五頁前二行沃埒舊作幹羅今改





總校官庶吉士臣張能照

校對官庶吉士臣陳崇本

謄錄監生臣宣葆光

欽定四庫全書薈要

集部

道園學古錄卷四十一



詳校官助教臣謝登雋

欽定四庫全書薈要卷一萬六千三百六十八

集部

道園學古錄卷四十一

歸田藁十五

元 虞集 撰

江西行省平章政事巴咱爾公惠政碑

國家置中書省以治內分行省以治外其官名品秩畧同所以達遠邇均勞佚叅錯出入而天下萬方如指諸掌矣是故匡衛無缺則宵旰紆其憂顧豪髮有間則舉

體為之不寧藩輔之寄豈不重哉江西之為省東接閩
浙西連荆蜀北逾淮汴以達于京師據嶺海之會斥交
廣之境蠻服內向島夷畢朝提封數千里固東南一都
會之輿區而龍興則其治所也昔在至元始置省事於
今六十有餘年貴人大官來治於斯者何啻十百其有
大勲勞大論議以宣布德意而鎮撫其民人利澤施於
一時聲名著於所部或由此而遷他鎮或自此而相朝
廷豈可以一二數哉然而匱室之書民間不得以多見

歲月之久閤閤或至於遺忘此豈非著作之闕文而今
昔之遺憾乎邇者龍興郡城耆老以為金紫光祿大夫
中書平章政事巴咱爾公之來長行省也惠澤深厚我
民感焉以集之嘗承乏太史也來請紀述其事集曰吾
聞平章公承天子之命佐丞相以分治德化者天子之
盛也政令者朝廷之故也公其肯自以為功乎且公之
為德忠厚而謙抑盛名譽以極稱述將非公之意也且
集老且病矣敢辭久之耆老以告其守臣守臣不能遏

也貳守燕琦為之啓諸藩宣之俊良度諸風紀之清峻
則皆曰平章之得民心久矣閭閻之言也信士民之請
也宜於是使其吏郭元善謀於臨川守臣袁說而為之
請焉乃使崇仁監邑巴圖來言曰昔唐渾咸寧治河中
連理之木生於其野野人以為言而史臣韓愈氏為之
頌之今我伯公自中書領行省所治數十郡或安於惠
而不能自知或遠於府而不能自言龍興之民以其居
之近也而知之深以其感之厚也而請之切市井草野

之民所請何以異乎然而不可辭矣乃作而言曰昔
我國家之興也寬仁弘遠豪傑畢出羣策並用時則有
若喀爾氏來拱來翼有以奇材在禁近有以經學定訄
謨烜赫光顯世載其勲今平章公揚休山立垂紳正笏
以臨其民儼然泰華之列嶽華星之在垣也執事東朝
溫恭有恪佐政省闡寬裕有容其分政而來也歛妙用
於無為而細民之信之也愈深著成效而不宰而君子
之望之也益重乃仍改至元之二年寇起南海人用震

驚適公始至調度有方恩意旁達兵不告勞民不告病
信惠所及朞月討平於是衆庶樂業年穀屢豐儲備有
恒運輸無闕所部善治姦慝不作乃若門隸使令不以
政事干官府賈市服食不以二價虐小民用人則盡同
列之情而不專議事則廣忠益之言而不惑五年十二
月城西災公親率有司救之登城望拜即反風火息其
感動之神又如此明日出私財為糜以賑失火家不足
出府庾之贏餘以給之民又大悅然則是不可以不書

已乃使復其耆老曰昔唐韋丹之治茲郡也去之數十年時王觀諸舊典始詔有所紀述以慰其吏民之心仁者之惠雖久遠而不能忘也而又何亟乎耆老曰吾儕小人朝不及夕願有紀述以傳見於將來矣乃為次第其說采其歌頌而載之庶乎觀風者有取焉其詞曰於穆聖皇顧諟南服選於近臣往長藩牧南服乃疆奠于湖江作鎮豫章臨制海邦百城來總相臣攸理公來匪亟赤舄几几盜在海壖勞我師干宣威孔時不動色

言執訊獲醜以歸司寇丞轄賓佐定功入奏波塵不驚
風雨時來載瞻我民休休以懷遠人鄙夫啓處食息孰
知功能貽我帝則顥顥印印如圭如璋春日載陽袞衣
繡裳既安既久成績不有曰惟天子上公所保民不我
欺自我不欺吏不我違自我不違嗟彼耆耄孰知君子
知其所知平易樂宣載歌載謠惠及我私毋以公歸天
子葵之

建寧路崇安縣尹鄒君去思之碑

高唐鄒君巴延從吉父之尹崇安也去官已三年邑之君子庶人耆老與在邑在野之民若僧道之流咸有遺愛之意願伐石以紀其政來徵文以刻之得其邑人文書述郡守中大夫按達拉列實跡以上諸帥府憲司者及前進士三寶努邑士彭炳所為序兼取於學校閭里之言而觀之未嘗不三誦而三歎也夫德澤之在人心傳之於久遠者非言無以宣智慮之精微見諸行事者非文無以達因一法之善著一時之利尚可使後來推

見以成其餘況乎除郡邑通弊之積立經久之法守而行之可以百世推之州里可以通行不出於欺世干譽而真使民不忘者其可以無記載乎崇安之為邑區別其土田名之曰都者五十田賦之多寡略相等也自民產之無制大家之田連跨數都總為一家以受役升合之賦力不能出其鄉則受役無時而休也五十都之田上送官者為糧六千石其巨室以五十餘家兼五千石而有餘其細民以餘家合千石而不足而賦役者常以

四百之細民配之五十之大家貧者一日當役而家已破是以三年六次預定之役常紛然不寧而民病甚矣君之來也取其都之田而分計之受役之田不出其都有一石之田者當一石之役有一斗之田者當一斗之差均齊方正較若畫一田多者受數都之役而不可辭田少者稱其所出而無倖免而中下無告之民庶乎其小康矣郡守善之命盡致其法於諸屬邑而推行之而建寧賦役之均是為四方最嗟夫遠方之民貧者不能

自活而等死之念生兼并而莫之制者驕狠以生變一
激於貪暴之吏而生無涯之禍者耳目之所及可知也
孰能如君為法於其疆又放諸旁邑既有成效如此使
盡施之當世民有不被其澤者乎昔趙清獻公之治此
邑也鑿溝洫以興水利溉民田數千畝去之四百年溝
湮而田荒莫有過而問焉者公修長溝十里繞楓樹坡
疊石以為固陂當大溪之衝水溢則隄易敗君又鑿石
山數十丈疏渠以分其勢而溝視趙公之遺跡無復餘

患矣邑多山田而歲易旱君以其公田之租修平糶之法而民從之致粟且千石而不以其道至者雖效之百石弗受也明年以時糶之民忘其憂頗得其息若干會盜起海上軍興所過郡邑騷動有不忍言者其出入君之境也相告勿敢有所犯而君為芟舍資糧屣履酒馘醫藥迎勞將送取具於平糶之餘息而民不知擾是以鄰郡若信若鉛山之民以飢散去而自歸於君者數百家咸受而授之業荒閒之濱幾無寸土之不闢期以三

年之復而新舊之民交相友助而無嫌焉此其為治之大畧也國家立鈔法以通天下之利幾百年矣朝廷憂其久而有弊思所以救之以其籌之者莫不詳且盡而山谷之民愚不知法擴而狃利偽造者滋多亦四方之通患也君之未至崇安也民有阻險以為奸衺利刃以拒逮大張聲勢以恐公私莫之勝者或反為之用不測之憂幾在旦夕蓋六七年矣君簡弓兵夜出其不意以捕之執為偽者數人得其鈔數百定論如法餘黨散去

盡壞其巢穴而一境偽造之風息焉而他境偽濫事覺吏人因為奸利輒疏富者而索之良善至不得休息君察其誣妄不輕追遣安慶得偽造者遣卒械其賊至宗安求所識而執之賊與卒謀盛服帶兵馳馬率吏望風入人家淫虐並作莫敢誰何君亟捕之得其狀執拘以歸諸安慶自是偽濫之連逮無至崇安者其民稍奠枕矣連氏母告其子出不反衆以無明驗却之君受而察之踰月得屍於山中則其兄某殺之也僧不文引黃貴

清告保安僧殺其兄者君鞠之執不文得汝殺人而誣他人乎黃之兄果為不文所殺而更誣保安以奪其寺且以脫已也童德誣告呂十二殺其兄君偶以他事上府他官不察其誣下呂獄君歸而理出之坐誣告者人服其神明遠方之俗部使者行郡則什百為羣相率以訐官吏虛實蓋未辨也部使者之崇安無一人言縣政不便者適朝廷有重使道過邑部使者告之曰此邑鄒令政甚善已為文書薦之使臣至朝廷幸詳言之使者

曰吾已審知之不待君之言也福州郡大而事繁獄訟不治帥府憲司檄君權推官多所申理崇安人詣大府乞歸君於邑者千百不止遂歸君崇安君以某年某月某日上某年某月某日受代在任之歲月與衆人同而所立卓卓如此亦難矣哉明年朝廷以例遣官遷調閩海守令以下於是行省帥府監察御史憲司咸舉君之能時漳州寇始平郡邑未安葺署君為郡判官以綏撫經理之所謂極當時之選者矣君之入仕也番直禁衛

歲久得官故御史中丞濟南張公養浩以大儒數歷臺省寬大嚴正英宗時嘗極諫放燈事時人比之蘇子瞻
泰定中七徵不起天歷初陝西大旱民相食郡縣為空
起公為西行臺中丞拯其民如赴水火見飢者哀之至
於痛哭旋以捐館陝人至于今思慕之君嘗得牧民忠
告之書於公焉蓋其所受教者深矣其同官主簿珍已
與君居未久而先去及調安溪監縣以君之行事為師
法而其邑亦告治所謂朝廷舉一而勸百則才賢君子

之效將遍乎天下沛乎國家之福哉乃為取其民之所
頌言而次第之俾得以詠歌而不遺於方來也其詞曰
俎俎我民孰父母予哿矣富人窶貧已瘃歸視其家朝
不謀夕歟盈倍蓰蹇蹇同役君來顧斯以均以平出無
華車食不鑿精分田畫里多寡小大隨量以供有正無
害事上敬共無言不孚從容教言孰侮孰誣藹藹有詢
寬來虛受先民之勞或飫之酒姦軌沮藏外絕不虞析
因隩夷養恬舒舒窮山深原樞牖戢戢征呼之卒無所

隳突匹夫匹婦飯黍豆羹先祝而嘗斬君久生君有王
命傷殘往撫不惠我私控告無所孰沃而嬉謹畏自持
孰勞而疲亦無倖遺黍稌盈疇羊牛多碩以享以食繫
君之錫老者日衰壯者日興君之所成民得以稱山有
松柏野有豐草雨露之濡君子壽考天子命吏臨方蒞
州視君之為莫不具脩

崇仁縣顯應廟沖惠侯故漢樂君之碑

崇仁縣治南望七里有山焉廣大高厚巍然其前其

顛峻而並銳能出雲雨蓄神明凡水旱災害之禱無不
通焉蓋巴之望而吏民之所依也謂之巴山後易稱相
山巴山者相傳云東漢書樂巴字叔元魏郡內黃人而
神仙傳云蜀成都人史稱巴好道順帝時給事掖廷仕
至黃門令性質直學覽經典雖在中禁不與諸常侍交
擢拜郎中遷桂陽太守始為桂人定婚姻喪紀之禮興
立學校以獎進之雖幹吏卑末皆課令習讀程試殿最
隨能陞授七年乞骸骨用李固薦拜議郎守光祿大夫

與杜喬周舉等八人巡行州郡巴使徐州還遷豫章太守郡土多山川鬼怪細民嘗破貨產以祈禱巴素有道術能役鬼神乃悉毀壞旁祀翦理姦巫於是妖異自消百姓始頗為懼終皆安之是時方分豫章郡東地置臨汝縣則今撫州之境也而相傳以為巴治妖民嘗至此故民間思之不忘以巴之名名茲山云其後嘗置巴山郡在縣西南四十里遺跡猶有可考而縣西門曰巴陵間巴山至縣所從入也則山果以巴得名久矣巴後遷

沛相徵拜尚書順帝之葬有司多毀民間墓巴上書切責禁錮還家二十餘年用竇武陳蕃薦徵拜議郎蕃武之禍以黨謫為永昌太守辭病不行上書理蕃武冤下廷尉自殺而相傳已有墓在山下而立祠焉今為廣教僧寺而山顛并祠南昌尉梅子真與叔元而唐鄧葉二道士配之蓋出近世云故宋紹興二十六年有宣教郎知縣事鄭圃孫懋為令以告民曰周人以諱事神而名不以山川名山曰巴懼民久以為未安也洞庭有山以

洞庭君之所居而謂之君山欒君自豫章為沛相獨不可謂之相山乎乃酌酒以告神而神悅暴之於民而民從遂更名相山矣咸淳元年縣寓公朝奉大夫知邵武軍事師得遇等言於朝曰縣有漢光祿大夫欒豫章之神祠墓存焉其神名在史冊守郡有功立朝有節訟陳寘之究竟以身殉風節凜然可以謂之神明者矣吏民禱祈必應而淫巫瞽史名稱鄙野非教民事神之道按祀典崇寧三年賜東明縣栢梁橋欒巴廟曰顯應廟大

觀四年封巴為冲惠侯顯應廟矣其山顛之祠與梅子
真同命得賜妙濟靈純其人之號者則用道家之言也
樂君生時靈異甚著人人能道之而斯邑之民有求輒
禱有禱輒應千百年以來殆不勝紀而圖志無古文字
金石可徵攷而邑民飲食必祝則不誣也國朝大德丁
未予留斯邑是年大旱八月旦迎神至縣治大雨連夜
嘗識其事于廟中已而廟燬予文亡焉後三十四年為
至元庚辰之歲其旱尤甚苗有未入土者民甚惶懼乃

四月三日也承直郎達魯噶齊鄂城巴圖齋肅民望遣其簿將仕佐郎豫章舒文琰疾馳詣廟迎神像至縣以禱拜跪未終薌燎方熾而林風四起陰雲以興簿至祠下惴惴之詞方伸要迎之具未起震雷已作於門廡駿奔不及於焱馳巴圖率其屬奉迎於西郊祝史未及成禮而沛澤滂沱衣冠盡濕隨至邑治雨連三日夜乃止四境以霑足告大家細民具牲馘醪酒大享相繼神之冠服輿帳旌旆煒煌一新不待勸而自至乃命典史豫

章胡天祥伐石於城北使教諭新城朱禮速予文以傳
之子曰諾又使稅副濟南魏淵奉神像還祠所過旄倪
留戀欣感淵乃周覽祠墓之舊迹適山川之奇偉而歸
告得神之情焉既而五月又不雨徧禱羣望神在禱中
是年會府及郡禱皆苦而縣六月三日雨十二日雨而
旬日之間雲雷並興四郊在望者或十里數十里或百
里或一日或二日或一時隨地而足稽諸旁近最為沾
渥焉是時已圖悉力禱祈以為已任齋戒兼旬而不間

嚴屠宰之禁厲不虔之俗家有疾苦而不顧身受勞苦而不辭忠翊校尉縣丞縉山張榮與簿及典史實協心焉必得雨而後止為吏者其憂民如此其必有以鑒其誠者乎天祥以石具告乃序其事而傳之為迎享神詞曰

有敦維崇其阻九陵時翕時舒與雲俱興降丘作神朱紱赤舄尚書邦君司命司直自古在昔于我故懷代識其來嘗與雨偕公宇斯穹私宇斯潔神君假思無怒伊

悅高山峻巖乎與禴禴禴不違俯依我人我人何有
有尊有俎黍稷既阜酒醴惟醕脾豚為羞有定有羹神
來顧歆百物之精神昔故鄉父老燕娛千載在斯不醉
無起乃大乃神碩彥乃生為嘉為喬為棟為楹為美為
英寶藏興殖無有遠邇來被來澤仰其虛矣穹窿休明
就其興矣流動滿盈時有序代神不可極曾孫孫子有
祀無數

昭毅大將軍平江路總管府達魯噶齊兼管內勸

農事輝圖公墓碑

元故昭毅大將軍平江路總管府達魯噶齊輝圖公唐古氏別名世雄世居濮州鄆城縣占籍噶達蘇和尼齊萬戶之軍以某年某月某日未上平江而卒得年若干歲其孤奉喪以歸祔而葬諸鄆城縣李康保柳行村先塋之次去鄆城四十里國家之制秩三品有功德可稱者得請諡以未及請諡墓碑未立若干年矣其第五子巴圖監邑撫之崇仁予自國史歸老僑居其野已圖之

在太常以奉印為職事嘗見予於朝而其季弟華善自
其兄裕勒通所來曰是不可失也宜亟請焉於是使華善
覃思追憶得其遺事以告邑教諭鄉貢進士朱禮邑之
隱君子陳德仁述狀來求銘予按其事有可以風動于
時者故為之書其大父琳沁嘗為明威將軍山東道宣
慰司副都元帥世祖皇帝初山東內附而弗靖久勞王
師甫定之事既平列于帥府者非才勇親信弗及也既
歿而子鄂允襲其職以才能選授大都西北關廂巡捕

之事有盜萬壽山廣寒殿御器金者獲之稱旨授武略將軍同知松江府事溧陽知州汀州總管又同知邵武路事披荊棘立官府有德政之碑轉懷遠大將軍德慶府總管而歿生九子平江公其嫡長也以蔭讓其弟沙卜珠從弟多羅岱為京畿廣衍倉使及中更大虧公賣其鄉之樓居以代之償久之又憂羣弟之無室也買舊產之沒于官者為券以付之俾安於自養又資多羅岱使干祿焉始從事浙西帥府攝清流武平二縣之長新行

至元銀鈔法署進義副尉濮州平準行用庫提領至元
二十七年例革除興國路大治縣達魯噶齊以治辦稱
遷保義副尉安豐路懷遠縣兼領蒙城懷遠秋夏之稅
蒙城有濁流北行人弗遜于常邑人歸罪於水公以私
錢買地溝而順之祠神之信於民者而為之誓俗以變
焉鎮南王出征道出其境館舍供帳之具事備而民弗
擾王善之解所御衣服弓矢以賜遷忠翊校尉相因倉
監支納倉糧九萬石出內惟謹陞嘉興等處運糧千戶

服紫衣佩金符矣居八年改昭信校尉溫台等處運糧
千戶延祐元年就任陞武德將軍海道都漕運萬戶府
副萬戶親運米貳百七十萬遷顯武將軍海道都漕運
萬戶佩雙珠虎符前後九度海而海運之事無所不周
知矣初世祖皇帝取東南之粟以實京師以航海為便
常苦舟不知道並海行虞險失遭吳人朱張二氏出入
海道甚習歲擇便利帥其私屬子弟駕海舟遠山即深
以行風水甚便以數千百浮數寸之木冒不測之淵以

進重利厚爵以募之其卒也致粟京師歲凡三四百萬斛矣朱張二氏得罪更用其人不習其事則多誤焉而公以久於其官遂進治其府而其政有可書者一曰運舟募諸瀕海之家民苦之而貧者常以舟壞誤事公請預以運費借之使買木以葺舟於是增舟之多可運一百萬斛二曰海舟受雇者直甚厚而無賴之人得錢即糜於飲博及期寧受責於無可奈何公為之封識時其當用而給之事無闕失三曰舟行海中愚無知者竊所

載以肆欲舟至直沽遺失無所從補公為法運官舶主
庾卒水工斲手之屬得相收伺連坐其弊遂革四曰糧
之登舟自溫台上至福建凡二十餘處皆取客舟載之
至浙西復還浙東入海公請移粟慶元海舟受之自烈
港入海無反覆之苦五曰溫台運舟水脚之費歲於浙
省關撥而散之運糧千戶之所治運者各於所治受鈔
復還溫台登舟往復不便公請悉留錢溫台舟人受訖
以行六曰舟行風水遲疾不齊舊例至直沽以次受之

而先至食盡久不得去公請于朝至則受之民以為便
七曰運舟之回恐有所掠買不法之物樞密差官兼察
之比舟出海口搜閱者因為奸利雖無所有猶誣執榜
掠空其囊篋多不能歸公請禁止之八曰海運之舟衆
數十萬薪爨之用取諸水濱道經河間監司率以鹽草
為辭而執掠之無所得爨公請正鹽草之界得取其短
小於鈎斷之外不預鹽草者九曰運舟冒險以出常賴
禱祠以安人心若所謂天妃海神水仙等祠凡十餘處

朝廷給牲牢醯醢之費歲為中統鈔百定而實不給也
公請假官木千封以貸人收子錢以供其事罷官給之
費而歲事豐備舟行以成山為望常苦霧起不見而冒
行以敗公請立置成山祠以禱朝廷從之十曰舟至直
沽則京師之人為肆沽賣官收其課甚夥後以爭鬪絕
舟人之登岸而公私大失其利公為嚴約束聽民得飲
食于市而爭鬪者悉與有司辨直曲立斷之凡此者皆
海運要務故備書之使觀者有攷焉有實喇卜珠卜丹

者與公常同為千戶公以都萬戶至京師而其人猶舊
職也公白于朝堂曰其實知斯人之才能而久於其職
可念也薦以自代時宰然之而公以懷遠大將軍為柳
州路達嚕噶齊矣秩滿改除昭毅大將軍平江路達嚕
噶齊公任海漕官於平江之日久周知其民事達於利
害情偽之故其民望之而公亦期有以自見而遽以即
世不亦惜哉嗟夫海運之實京師祖宗萬世之長策也
然而東南之民力竭焉頻歲浙西水旱廩不充數江淮

上流三省數十郡州縣之吏斗升之民終歲勤動越江
歷湖以助其不足而爭鬪勿戢又有深可慮者則有大
夫君子之所不能忘其憂者也巴圖之治崇仁官不十
日即以轉輸在行至集慶水洋率民舟以待而海人頗
橫不測或見巴圖於沙際而識之驚曰此吾萬戶之子
也相率羅拜更相告而衛之而所部得無失然則公之
遺愛在人可知矣而其用不大究於時惜哉公之夫人
朱氏周氏皆封陳臺夫人子九人長哈喇承事郎宛州

路同知托克托特穆爾東平等處民戶總管裕勒通承直郎
平江路長洲縣達魯噶齊拜特穆爾未仕巴圖承直郎撫
州路崇仁縣達魯噶齊鼎滿台早世華善安圖趙安皆未
仕女五人孫男二十人女十一人銘曰

皇有中州東多輿區維鄆之城沛其來居自公之先克
順克類起家明威以貳東帥侃侃譙侯政在刻詞有子
五人出處各宜公實孝友亦有九子身服官政職勞不
弛淮江越閩皆長其民練習既優百為是親相彼東南

稼穡豐茂京坻有容歲廣其受航海以東千萬其儲九
涉鯨波無少不虞去之幾年人見其子泣涕感慕是孰
之使長洲告能崇仁公嚴先世其家斯人來瞻俾書貞
珉以告來裔太常徵焉行錫節惠

元故累贈集賢直學士亞中大夫追封魏郡侯張
公神道碑銘

宜春太守張熙祖告於前太史虞集曰昔先君棄孤子
於延祐己未十一月二十七日年六十有八官為大夫

階奉訓爵為男所封縣曰玉山勲曰飛騎尉明年二月
壬申葬諸信州路貴溪縣長山之中其鄉也子為我志
而銘之既納諸幽矣後十二年為天順年蒙恩奉被制
書位為大夫階亞忠直集賢為學士爵為侯所封曰魏
郡先世之賜履也勲為輕車都尉階三品於法當樹表
於神道子為我序而文之以刻諸石集與宜春有同朝
之好不敢固辭其序曰世祖皇帝克有江南故開府儀
同三司特進上卿知集賢院事贈輔成贊化保運神德

真君張公留孫以老子之道日見尊禮非有宿衛之勞而常在帷幄非有輔相之位而常與國論有賓師之貴而無職守之責居富貴之極而不易慈儉之素歷仕累朝垂四十年為朝廷宮掖中外所尊敬於是贈曾祖宏綱集賢大學士光祿大夫柱國魏國公諡安惠祖粹夫金紫光祿大夫司徒上柱國魏國公諡康穆父九德太中大夫同知江東道宣慰司事累贈開府儀同三司大司徒上柱國魏國公諡文簡官位勲爵皆一品推封自

開府矣開府有第二人公其季也諱廣孫字師成當開
府盛時天子卜相則問焉名皇子則問焉大臣進退則
問焉高爵膺仕其所推薦者言無不酬布在中外郡侯
於此時引道家之言以太盛為忌退然守朴利欲之念
不萌于胸中而開府曰不可使魏國世家無傳以報國
之厚恩也乃以其子熙祖見成宗皇帝於便殿得備宿
衛未幾丞利用監司直於翰林僉中政院事而公有王
山之封矣丐外便養倅衢及澧進拜宣城守而有魏郡

之封矣歷盱宜春三為二千石皆有惠政而母魏郡太夫人以高年受康寧之養宗族親戚鄉黨稱焉有子三人孫五人伐石為表於公墓則某年某月某日也其銘詩曰

昔韓文成韓相之孫帷幄運籌身退名存歆拜太守太山之側徙由河南清河是宅聞望之隆著於清河本支扶疎子孫衆多文瓘相唐表著于史有孫刺杭來南之始其後散處于饒于歆盱之石筍大族之別上礫潺湲

貴溪之原衣冠蟬聯歷宋至元世有令德亦或為士隱
不至伏顯不至異乃生安惠抱道隱居太山高原福慶
之儲肆及康穆源深本固積而未發匪躬之故惟文簡
公德懋以淳懇款鄉黨渾渾里門開府在朝天子有錫
起家別駕以佐邦國于藩于宣政成無言乃開魏國三
世以傳開府真君名動海宇道德之言治化攸除難弟
郡侯退焉林丘嘉德孔脩不競不逮觀稼于田觀學于
塾禮讓是教弟子是淑孰飢我食孰危我安桑梓敬恭

非禮弗干馬^四馬高蓋過者必式封君之間歷世所積四
世三公繼之侯封太守之賢進德尚豐崑山之珉既堅
既白其爵屢書繼此有刻長山之原其來舒舒松柏蒼
蒼繫德之符

道園學古錄卷四十一